

## IMA NDITQ-ETE

Mme Nwede Eke John Ewetde

OYOHQ UKPEP-NKPO 361

Eke Mkpawara

**IKO IBUOT: “Edieke nnyin isañade ke uñwana, kpa nte Enye odude ke uñwana, nnyin imoduk nduk ye kiet eken, ndien iyip Jesus Eyen Esie eyet nnyin isana ke kpukpru mme idiok-nkpọ” (1 Nwede John 1:7).**

### Mbet Emi Jesus Akamade

Ekediñq John, owo mbet nte “mbet emi Jesus amade” ke ini Jesus okodude ke isoñ. Enye ama abiat ekese ini ye Jesus; enye Peter ye James ema ekop inemesit ke ndidu ñkpere Jesus, ekan mme Mbet eken.

Ke ini John ama ekewet Eti-mbuk esie okure, enye odoho ete: “Ewet mmọ emi, man mbufo enim ke akpanikọ ete Jesus edi Christ, Eyen Abasi; man, ke erinim ke akpanikọ, mbufo ekpenyene uwem ke enyiñ Esie” (John 20:31). John ama onim ke akpanikọ ete ke Jesus ekedi edisana Eyen Abasi, oyoho Owo Iba ke mbuot Abasi Ita Ke Kiet. Enye ekewet ete: “IKO onyũñ edi Abasi ... Ndien IKO akabare edi obukidem onyũñ oduñ ye nnyin” (John 1:1, 14). Oro ekedi Jesus.

Ke ama okodu ye Jesus ke isua ita ye ubak, akpañ utoñ oño ikọ Esie, okut mme utibe-nkpọ emi Enye akanamde, ndien okut nte ewotde Enye ke Kros, Enye onyũñ afiak odu uwem ke obukidem, John ama onim ke akpanikọ ete ke Jesus edi Christ. Enye ama ayak ofuri ini ye ukeme esie oño man ayarare akpanikọ emi oño mbio efen.

Ke John ama akakabare edi akani eren, ke ama okonyũñ anam utom ke esit akpanikọ oño Abasi ye owo ke ediwak isua, Abasi ama edemere enye man ewet mme ñwede, emi ewetde mmọ esin ke Nwede Abasi enim enọ nnyin. Ntoño-ikọ esie ekedi ukem-ukem ye ekikere emi enye ekewetde ke akpa ñwede esie: ete, ke Jesus okodu ke eritoño ye Abasi, ndien ke ama edi ke ererimbot man oduñ ye owo.

### Nditim Mfiok

John eketiñ abañña mme ñkpọ emi enye okofioke abañña. Ke mme ñwede esie emi, enye etiñ ikọ emi, “ifiok ite” awak akan ñkpọ nte ikọ edip ye duop. Enye ama otim ofiok kpukpru se enye eketiñde. Enye ama odomo ofiok ete ke Jesus anyañña owo osio ke idiok-nkpọ onyũñ oño owo ukeme ndikan idiok-nkpọ, ndien enye okoyom ererimbot efiok akpanikọ emi.

John ama oño nta inañ emi akanamde enye ewet mme ñwede oro: oro ekedi man adian idara oño mme andinim ke akpanikọ; ndinọ mmọ ntọt ete ekpeme idem mbak idiok-nkpọ; ndinọ mmọ ntọt mbaña nsu-nsu mme andikpep; ndinyũñ nnam mbuotidem mmọ osoñ ke Christ, onyũñ anam mmọ enyene idorenyin nsinsi uwem adaña nte mmọ esuk ekade iso ndisaña ye Abasi ke uñwana Ikọ Esie, emi edide Nwede Abasi.

### Oyoho Idara

“Man idaresit nnyin oyoho.” Ata inemesit iduhe ke ererimbot ke esiode ifiok erinyana ukpoñ efep. Sia Jesus edide Eyen Abasi, Enye oño ikot Esie odudu ndidu uwem eke akande idiok-nkpọ. Enye edi uñwana ererimbot, ndien edieke nnyin isañade ye Enye, ana nte isaña ke uñwana.

“Emi edi ikpe oro, ete, uñwana ama edi ke ererimbot, edi owo emama ekim ekan uñwana; koro utom mmọ odiokde” (John 3:19). Ke ini mme owo enamde se idiokde mmọ esima ndifuk ndudue oro. Idem ekpri eyen ofiok ke ini enye anamde se mifonke, ndien ke ediwak ini enye odomo ndinam eka esie okufiok midighe ntre enye osu nsu.

Nnyin emi idide mme anditiene-Christ ana nte idu uwem man kpukpru se inamde ekeme ndida ñworo ke uñwana. Edieke nnyin iyomde ndisaña ye Jesus, nnyin inyene ndidu uwem nte Enye okodude. “Owo eke odohode ete imọ iduñ ke Enye, akpasaña odu uwem kpa nte Enye akasañade” (1 John 2:6).

### Idiok-nkpọ Iduhe

Oyoho ñkpọ iba emi akanamde John ewet ñwede esie ekedi emi: “Ñkpri nditọ mi, mmewet ñkpọ emi nnọ mbufo, man mbufo ekunam idiok-nkpọ” (1 John 2:1).

Edi ọkpọsọn nkpọ idiọk owo ndifiọk ete ke owo ekeme ndidu ke ererimbot emi inamke idiọk-nkpọ. Ekese mmọ emi edọhọde ete idi mme anditiene-Christ ekot se John ewetde, enyuñ edọhọ ete ke se John ewetde idighe ntre. Mmọ edọhọ ete ke idighe mmem-mmem nkpọ owo ndidu uwem nte John ọdọhọde. Edi John ama odu; ndien edieke owo kiet ekekemedede, mme owo eken ekeme, ke mfọn Abasi.

John ama etiñ ete “Edieke nnyin isañade ke uñwana, kpa nte Enye odude ke uñwana, nnyin imoduk nduk ye kiet eken, ndien iyip Jesus Eyen Esie eyet nnyin isana ke kpukpru mme idiọk-nkpọ” (1 John 1:7). Ana nte enyaña nnyin esio ke idiọk-nkpọ man nnyin isaña ke uñwana. Ndien ke ini isañade ke uñwana oro, Iyip Jesus eyet nnyin isana ke kpukpru mme idiọk-nkpọ, emi edi edinam asana. Idem uduot idiọk-nkpọ, nkpọ emi esinukde nnyin ndinam idiọk-nkpọ emi nnyin ikedade imana, eyet enye esio ke uwem nnyin.

Ndusuk owo eyekot itie emi: “Edieke nnyin idọhọde ite, nnyin inyeneke idiọk-nkpọ, nnyin ibabiaña idem, akpanikọ inyuñ iduhe nnyin ke esit” (1 John 1:8), ndien enim ete ke oro ọnọ mmọ unen ndidọhọ ete ke kpukpru owo enam idiọk-nkpọ. Edi ewet ufañ n̄wed oro enọ mmọ emi mimanake obufa, edi ekere ete ke mme imọ idighe ndiọi owo. Mmọ ekere ete ke mme imọ imefọn ikem okposuk edi mmọ mibọhọ erinyaña. Mmọ ekere ete ke iyeka Heaven okposuk edi nte mmọ mikabakere esit. Oruk mme owo oro ebabiaña idem mmọ.

Ufañ n̄wed emi etienede ke edem etiñ ete, “edieke nnyin iyararede mme idiọk-nkpọ nnyin, Enye edi anam akpanikọ onyuñ enen, ete ifen mme idiọk-nkpọ nnyin, inyuñ iyet nnyin isana ke kpukpru mme ukwañkpọ” (1 John 1:9). Kpukpru nnyin ima inam idiọk; ndien ana nte nnyin inyime ite ke idi mme idiọk owo. Nkpọ efen emi inyenede ndinam edi ndikabare esit mkpọn idiọk-nkpọ. Ndien Jesus efen, nnyin inyuñ idu uwem unana idiọk-nkpọ adaña ini nte nnyin isuk ikopde uyo inọ Ọbọñ.

### **Ndikan Andidiọk**

John ọkọdọhọ ete ke imọ ikewet inọ mkparawa koro mmọ “ekekan andidiọk” (1 John 2:13). Ndidi andikan ọwọrọ ete ke amakan. Andidiọk edi Satan, ndien ke ini nnyin idide mme anditiene-Christ, nnyin iduọhọ ke idomo emi enye enimde nnyin ke iso. “Mma n̄wewet nnọ mbufo, mkparawa, koro mbufo ekopde idem, ikọ Abasi onyuñ oduñde mbufo ke esit, mbufo ema enyuñ ekan andidiọk” (1 John 2:14). Mme andikan edu uwem emi akande idiọk-nkpọ.

Ntak emi esinde ediwak owo edọhọ ete ke nnyin ikemeke ndidu uwem emi akande idiọk-nkpọ edi koro mmọ emade ndusuk idiọk-nkpọ enyuñ esuk eyoyom ndika iso nnam mmọ. Edieke owo eneñere oyom ndidu uwem unana idiọk-nkpọ, Abasi eyenọ enye ukeme.

### **Ndima Ererimbot**

“Ekuma ererimbot, ye se idude ke ererimbot, Edieke owo ekededi amade ererimbot, ima Ete iduhe enye ke esit’ (1 John 2:15). Ekeme ndidi se owo amade idighe idiọk-nkpọ, edi edieke enye amade nkpọ oro akan Abasi, enye inamke se ifọnde. Abasi oyom akpa itie ke uwem nnyin; ndien edieke nnyin ikerede ibaña mme ufọk, isọñ, okuk, odudu ye ukpono ikan nte ikerede ibaña Jesus, ima Ete iduhe ke esit nnyin. Mme nkpọ ererimbot emi eyebe efep, ndien edieke nnyin minyeneke ima Abasi ke esit, nkpọ idisuhọke inọ nnyin. Edi edieke nnyin inamde uduak Ete, nnyin “iyedu” ke nsinsi.

### **Nsu-nsu Mme Andikpep**

Oyọhọ ntak ita emi John ekewetde ekedi man ọnọ mme owo ntọt ke abaña nsu-nsu mme andikpep. Ufọk Abasi ọkọtọñọ obufa, ndien Satan ekedi ke usuñ kiet mme eken, ndibiat mbuotidem mme owo, ukem nte enye osuk anamde mfin emi.

Usuñ kiet emi Satan adade etiene owo edi ndinam mme owo ekunim ete ke Jesus edi Eyen Abasi, n̄ko ke Enye okodu ke eritọñọ ye Abasi, ndien okonyuñ oto ke Enye enam mme ererimbot. Edi John ama onim emi ke akpanikọ ndien enye ọdọhọ ete ke owo ekededi eke minimke ke akpanikọ edi osu nsu, onyuñ edi asua-Christ. Kere baña kpukpru owo emi ekade ufọk Abasi edi n̄kukure se mmọ enimde ke akpanikọ edi ke Jesus ekedi akamba andikpep ye anditiñ n̄niñ-n̄nim ikọ, ke Enye n̄ko okonyuñ edi owo nte nnyin. Mme mmọ emi edi asua-Christ. Edieke ekpepde abaña nte nkpọ ọkọwọrọde odu ke idem esie, onyuñ ọkpuhọrede uduot esie nsit-nsit tutu okosim idaha eke mmọ edude idahemi (evolution) ke ufọk n̄wed, ti ete ke oro edi ekikere owo, ndien ke idighe akpanikọ. Mme nta-ifiọk ke ekaka iso ndinyene nsio-nsio ekikere mbaña nte ererimbot ye mme andiduñ enye ekesañade edu, edi Ikọ Abasi ikpuhọkere. Ti ete ke N̄wed Abasi etiñ abaña Jesus ete: “Oto ke Enye ekenam kpukpru nkpọ; ndien mitoho ke Enye, inamke nkpọ baba kiet eke ekenamde” (John 1:3).

### **Spirit Akpanikọ**

Jesus ama ọdọhọ ete ke imọ ima inyọn ika ke Heaven, ke iyedọn Iberedem, kpa Spirit akpanikọ. “Edi ke adañemi Enye oro edidide, kpa Spirit akpanikọ, Enye eyeda mbufo oduk ke ofuri akpanikọ” (John 16:13). John eketiñ abaña Spirit akpanikọ nte “Enye emi edide Edisana”; nko “Spirit emi Christ ama añwaña mbufo ke idem” mmọdo “ke esit mbufo oduñ, ... onyuñ edide akpanikọ, midighe nsu, ndien nte Enye ekekpepde mbufo, mbufo esuk eduñ ke Enye” (1 John 2:20, 27).

Imokut mi ite ke John ọkọkwọrọ abaña enọ mfọn Abasi ita eke spirit, nte enye ekewetde mme n̄wed esie: erifen mme idiọk-n̄kpọ, emi edide utebe-ikpe; ediyet esit asana, emi edide edinam-asana; ye uduọk-mmọn Edisana Spirit, emi edide “Spirit emi Christ ama añwaña mbufo ke idem”.

### **Se John Etiñde Abaña Anditiene-Christ**

“Ndima, nnyin idi nditọ Abasi ke emi; ndien iyarakere kaña iwut se nnyin ididide. Edi nnyin ifiọk ite, edieke Enye ediwọrọde owut idem nnyin iyebiet Enye, koro nnyin iyekut Enye nte Enye edide” (1 John 3:2). Edieke nnyin idide “nditọ” Abasi, nnyin iyenyene ido Ete nnyin. “Baba owo kiet eke Abasi okobonde inamke idiọk-n̄kpọ” (1 John 3:9).

Ukpuhọre odu ke ufọt nditọ Abasi ye nditọ Satan. Nnyin imesikut uwem mmọ emi edọhọde ete idi nditọ Abasi, ndien usuk idaha nnyin ikere mme mmọ ekpuhọre ye ererimbot. “Eda emi eyarare efiọk nditọ Abasi ye nditọ Satan; baba owo kiet eke minamke edinen ido idighe eke Abasi, ndien edi ntre ye owo emi mimaha eyen-ete esie” (1 John 3:10).

Nte omokut ete edi ata akpan n̄kpọ ọnọ fi, ndima eyen-ete fo? Ikọ Abasi etiñ ọnọ nnyin ete, “Owo eke asuade eyen-ete esie edi obom” (1 John 3:15). Ndien baba owot owo emi mikabakere esit idikaha Heaven. Edi ido nnyin ayarare owut nte nnyin imade eyen-ete nnyin. “N̄kpri nditọ mi, ayak nnyin ikuma ke ikọ-inua ye ke edeme, edi ayak nnyin ima ke erinanam ye ke akpanikọ” (1 John 3:18).

Edieke nnyin idude uwem nte Abasi oyomde, Enye eyekop onyuñ ọbọrọ akam nnyin. “Ndima, edieke esit nnyin mibiomke nnyin, nnyin imenyene uko ye Abasi; iyenyuñ ibọ se ededi eke ibeñede ke ubọk Esie, sia nnyin inimde mbet Esie, inyūn inamde se inemde Enye esit” (1 John 3:21, 22). Ndien ke ini nnyin inimde mbet Esie, Spirit Abasi eyedi ntiense ye spirit nnyin ete ke nnyin idi nditọ Abasi.

### **MME MBUME**

1. Nso oruk enyiñ ke ekesikot John, owo-mbet?
2. Nso idi ntak emi enye ekewetde N̄wed Eti-mbuk John?
3. Nso idi akpan n̄kpọ emi John ewetde ke N̄wed Esie?
4. Nọ ntak ita emi akanamde John ewet mme n̄wed emi.
5. Nso idi ntak emi mme owo emade ekim ekan uñwana?
6. Didie ke nnyin mme anditiene-Christ ikpesaña ke ererimbot emi?
7. Nso ke Jesus edinam ọnọ nnyin edieke iyararede mme idiọk-n̄kpọ nnyin?
8. Nso ke John eketiñ abaña mmọ emi emade ererimbot?
9. John okokot didie mmọ emi minimke ite Jesus edi Eyen Abasi?
10. Nso ke John eketiñ abaña nnyin adian eyen-ete?